

## ॥प्रथमः प्रश्नः॥

## ॥तैत्तिरीयसंहितायां चतुर्थकाण्डे प्रथमः प्रश्नः॥

युञ्जानः प्रथमं मनस्तत्त्वाय सविता धियः। अग्निं ज्योतिर्निचाय्यं पृथिव्या  
अध्याभरत्। युक्ताय मनसा देवान्सुवर्यतो धिया दिवम्। बृहज्ज्योतिः करिष्यतः  
सविता प्र सुवाति तान्। युक्तेन मनसा वयं देवस्य सवितुः सुवे। सुवर्गेयाय शक्त्यै।  
युञ्जते मन उत युञ्जते धियो विप्रा विप्रस्य बृहतो विपश्चितः। वि होत्रा दधे वयुनाविदेक  
इन्- (१)

मही देवस्य सवितुः परिष्टुतिः। युजे वां ब्रह्म पूर्य नमोभिर्वि श्लोका यन्ति  
पृथ्यैव सूरः। शृण्वन्ति विश्वे अमृतस्य पुत्रा आ ये धामानि दिव्यानि तस्थुः। यस्य  
प्राणमन्वन्य इद्ययुर्देवा देवस्य महिमानमर्चतः। यः पार्थिवानि विममे स एतंशो  
रजांसि देवः सविता महित्वना। देवं सवितुः प्र सुव यज्ञं प्र सुव (२)

यज्ञपतिं भगाय दिव्यो गन्धर्वः। केतपूः केत नः पुनातु वाचस्पतिर्वाचमद्य स्वदाति  
नः। इमं नो देव सवितर्यज्ञं प्र सुव देवायुवः सखिविदः सत्राजितं धनजितं  
सुवर्जितम्। ऋचा स्तोमः समर्धय गायत्रेण रथन्तरम्। बृहदायत्रवर्तनि। देवस्य त्वा  
सवितुः प्रसवेऽश्विनोर्बाहुभ्यां पूष्णो हस्ताभ्यां गायत्रेण छन्दसाऽऽददेऽङ्गिरस्वदभ्रिरसि  
नारि- (३)

रसि पृथिव्याः सधस्थादग्निं पुरीष्यमङ्गिरस्वदा भर त्रैष्टुभेन त्वा छन्दसाऽऽ-  
ददेऽङ्गिरस्वदभ्रिरसि नारिरसि त्वया वयः सधस्थ आग्निः शकम् खनितुं पुरीष्यं  
जागतेन त्वा छन्दसाऽऽददेऽङ्गिरस्वद्वस्त आधाय सविता बिभ्रदभ्रिः हिरण्ययीम्।  
तया ज्योतिरजस्रमिदग्निं खात्वी न आ भरानुष्टुभेन त्वा छन्दसाऽऽददेऽङ्गिरस्वत्॥ (४)

इद्यज्ञं प्र सुव नारिरानुष्टुभेन त्वा छन्दसा त्रीणि च॥ [१]

इमामगृभ्यन्नामृतस्य पूर्व आयुषि विदथेषु कव्या। तया देवाः सुतमा  
बभूवुरऋतस्य सामन्त्सरमारपन्ती। प्रतूर्तं वाजिन्ना द्रव वरिष्ठामनु संवतम्। दिवि  
ते जन्म परममन्तरिक्षे नाभिः पृथिव्यामधि योनिः। युञ्जाथाः रासभं युवमस्मिन्  
यामे वृषण्वसू। अग्निं भरन्तमस्मयुम्। योगेयोगे त्वस्तरं वाजैवाजे हवामहे। सखाय  
इन्द्रमृत्यै। प्रतूर्व- (५)

त्रेह्यवक्रामन्नशस्ती रुद्रस्य गाणपत्यान्मयोभूरेहि। उर्वन्तरिक्षमन्विहि  
स्वस्तिगव्यूतिरभयानि कृण्वन्न। पूष्णा सयुजा सह। पृथिव्याः सधस्थादग्निं  
पुरीष्यमङ्गिरस्वदच्छेद्वाग्निं पुरीष्यमङ्गिरस्वदच्छेमोऽग्निं पुरीष्यमङ्गिरस्वद्वरिष्यामोऽग्निं  
पुरीष्यमङ्गिरस्वद्वरामः। अन्वग्निरुषसामग्रमख्यदन्वहानि प्रथमो जातवेदाः। अनु  
सूर्यस्य (६)

पुरुत्रा च रश्मीननु द्यावापृथिवी आ ततान। आगत्य वाज्यध्वनः सर्वा मृधो वि  
धुनुते। अग्निः सधस्थे महति चक्षुषा नि चिकीषते। आक्रम्य वाजिन्यृथिवीमग्निमिच्छ  
रुचा त्वम्। भूम्या वृत्वाय नो ब्रूहि यतः खनाम् तं वयम्। द्यौस्ते पृष्ठं पृथिवी  
सधस्थमात्माऽन्तरिक्षः समुद्रस्ते योनिः। विख्याय चक्षुषा त्वमभि तिष्ठ (७)

पृतन्यतः। उत्क्राम महते सौभंगायास्मादास्थानाद्विणोदा वाजिन्। वयः स्याम  
सुमतौ पृथिव्या अग्निं खनिष्यन्त उपस्थे अस्याः। उदक्रमीद्विणोदा वाज्यर्वाकः स  
लोकः सुकृतं पृथिव्याः। ततः खनेम सुप्रतीकमग्निः सुवो रुहाणा अधि नाक उत्तमे।  
अपो देवीरुपं सृज मधुमतीरयक्ष्मार्य प्रजाभ्यः। तासां स्थानादुज्जिहतामोषधयः  
सुपिप्पलाः। जिघर्म्य- (८)

ग्निं मनसा धृतेन प्रतिक्ष्यन्त भुवनानि विश्वा। पृथुं तिरश्चा वयसा बृहन्तं  
व्यचिष्टमन्नं रभसं विदानम्। आ त्वा जिघर्मि वचसा धृतेनारक्षसा मनसा तज्जुषस्वा।  
मर्यश्रीः स्पृहयद्वर्णो अग्निर्नाभिमृशे तनुवा जर्हृषाणः। परि वाजपतिः कविरग्निरह्व्या  
न्यक्रमीत्। दधद्रत्नानि दाशुषे। परि त्वाऽग्ने पुरं वयं विप्रः सहस्य धीमहि। धृषद्वर्णं  
दिवेदिवे भेत्तारं भङ्गुरावतः। त्वमग्ने द्युभिस्त्वमांशुशुक्षणिस्त्वमद्भ्यस्त्वमश्मनस्परि। त्वं  
वनेभ्यस्त्वमोषधीभ्यस्त्वं नृणां नृपते जायसे शुचिः॥ (९)

प्रतुर्वन्मर्यस्य तिष्ठ जिघर्मि भेत्तारं विश्वं॥ [२]

देवस्य त्वा सवितुः प्रसवेऽश्विनोर्बाहुभ्यां पूष्णो हस्ताभ्यां पृथिव्याः सधस्थेऽग्निं  
पुरीष्यमङ्गिरस्वत्खनामि। ज्योतिष्मन्तं त्वाऽग्ने सुप्रतीकमजस्रेण भानुना दीद्यानम्।  
शिवं प्रजाभ्योऽहिंसन्तं पृथिव्याः सधस्थेऽग्निं पुरीष्यमङ्गिरस्वत्खनामि। अपां  
पृष्ठमसि सप्रथा उर्वग्निं भरिष्यदपरावपिष्ठम्। वर्धमानं मह आ च पुष्करं दिवो

मात्रया वरिणा प्रथस्व। शर्म च स्थो (१०)

वर्म च स्थो अच्छिद्रे बहुले उभे। व्यचस्वती सं वसाथां भर्तमग्निं  
पुरीष्यम्। सं वसाथाः सुवर्विदा समीची उरसा त्मना। अग्निमन्तर्भरिष्यन्ती  
ज्योतिष्मन्तमजस्रमित्। पुरीष्योऽसि विश्वभराः। अथर्वा त्वा प्रथमो निरमन्थदग्ने।  
त्वामग्ने पुष्करादध्यथर्वा निरमन्थत। मूर्ध्नो विश्वस्य वाघतः। तमु त्वा दध्यङ्घ्रिः पुत्र  
ईधे (११)

अथर्वणः। वृत्रहणं पुरन्दरम्। तमु त्वा पाथ्यो वृषा समीधे दस्युहन्तमम्।  
धनुञ्जयः रणैरणे। सीदं होतः स्व उ लोके चिकित्वान्त्सादया यज्ञः सुकृतस्य  
योनौ। देवावीर्देवान् हविषा यजास्यग्ने बृहद्यजमाने वयो धाः। नि होतां होतृषदने  
विदानस्त्वेषो दीदिवाः असदथ्सुदक्षः। अदब्धव्रतप्रमतिर्वसिष्ठः सहस्रम्भुरः शुचिजिह्वो  
अग्निः। सः सीदस्व महाः असि शोचस्व (१२)

देववीतमः। वि धूममग्ने अरुषं मियेध्य सृज प्रशस्त दर्शतम्। जनिष्वा हि  
जेन्यो अग्ने अह्नाः हितो हितेष्वरुषो वनेषु। दमेदमे सप्त रत्ना दधानोऽग्निरहोता नि  
पसादा यजीयान्॥ (१३)

स्थ ईधे शोचस्व सुसविशतिश्च॥ [३]

सं ते वायुर्मातरिश्वा दधातूत्तानायै हृदयं यद्विलिष्टम्। देवानां यश्चरति प्राणथेन  
तस्मै च देवि वर्षडस्तु तुभ्यम्। सुजातो ज्योतिषा सह शर्म वरूथमासदः सुवः।  
वासो अग्ने विश्वरूपः सं व्ययस्व विभावसो। उदं तिष्ठ स्वध्वरावा नो देव्या कृपा।  
दृशे च भासा बृहता सुशुक्निराग्ने याहि सुशस्तिभिः। (१४)

ऊर्ध्व ऊ षु णं ऊतये तिष्ठा देवो न संविता। ऊर्ध्वो वाजस्य सनिता  
यदञ्जिभिर्वाघद्विर्विह्वयामहे। स जातो गर्भो असि रोदस्योरग्ने चारुर्विभृत ओषधीषु।  
चित्रः शिशुः परि तमाऽस्यक्तः प्र मातृभ्यो अधि कनिर्क्रदद्वाः। स्थिरो भव वीड्वङ्ग  
आशुर्भव वाज्यर्वन्न। पृथुर्भव सुषदस्त्वमग्नेः पुरीषवाहनः। शिवो भव (१५)

प्रजाभ्यो मानुषीभ्यस्त्वमङ्गिरः। मा द्यावापृथिवी अभि शूशुचो माऽन्तरिक्षं मा  
वनस्पतीन्। प्रेतुं वाजी कनिर्क्रदन्नानदद्वासभः पत्वा। भरन्नग्निं पुरीष्यं मा पाद्यायुषः

पुरा। रासंभो वां कनि॒क्रद॒त्सुयु॑क्तो वृष॒णा रथे॑। स वांम॒ग्निं पु॑री॒ष्यमा॒शुर्दू॑तो व॒हादि॑तः।  
वृषा॒ऽग्निं वृष॑णं॒ भर॑न्न॒पां गर्भ॑ꣳ समु॒द्रिय॑म॒। अ॒ग्न आ या॑हि (१६)

वी॒तय॑ ऋ॒तꣳ स॒त्यम्। ओष॑धयः॒ प्रति॑ गृ॒ह्णीता॒ग्निमे॒तꣳ शि॒वमा॒यन्त॑म॒भ्यत्र॑ युष्मान्।  
व्यस्य॒न्विश्वा॑ अम॒तीर॑राती॒र्निषी॑द॒न्नो अप॑ दु॒र्मति॑ꣳ ह॒नत्। ओष॑धयः॒ प्रति॑ मोदध्वमे॒नं  
पुष्पा॑वतीः सु॒पिप्प॒लाः। अ॒यं वो॒ गर्भ॑ ऋ॒त्वियः॑ प्र॒त्नꣳ स॒धस्थ॑मास॒दत्॥ (१७)

सुश॒स्तिभिः॑ शि॒वो भ॑व या॒हि ष॒द्विꣳश॒च्च॥

[४]

वि पाज॑सा पृथु॒ना शो॑शु॒चानो॒ बाध॑स्व द्विषो र॒क्षसो॒ अमी॑वाः। सु॒शर्म॑णो बृ॒हतः॑  
शर्म॑णि स्याम॒ग्रेर॒हꣳ सु॒हव॑स्य॒ प्रणी॑तौ। आपो॒ हि ष्ठा म॑यो॒भुव॑स्ता न॒ ऊर्जे॑ द॒धात॑न।  
म॒हे र॑णाय॒ चक्ष॑से। यो वः शि॒वत॑मो र॒सस्त॑स्य॒ भाज॑यते॒ह नः॑। उ॒शती॑रि॒व मा॒तरः॑।  
तस्मा॒ अरं॑ गमा॒म वो॒ यस्य॑ क्षया॒य जि॒न्व॑था। आपो॒ ज॒नय॑था च नः। मि॒त्रः (१८)

सꣳसृ॒ज्यं पृ॒थिवीं॑ भू॒मिं च॒ ज्योति॑षा स॒ह। सु॒जातं॑ जा॒तवे॑दसम॒ग्निं वै॒श्वान॑रं  
वि॒भुम्। अ॒यक्ष्मा॑य॒ त्वा सꣳ सृ॑जामि प्र॒जाभ्यः॑। वि॒श्वे त्वा दे॒वा वै॒श्वान॑राः सꣳ  
सृ॒जन्त्वानु॑ष्ट॒भेन॒ छन्द॑साऽङ्गि॒रस्व॑त्। रु॒द्राः स॒म्भृत्य॑ पृथि॒वीं बृ॒हज्यो॑तिः॒ समी॑धिरे।  
तेषां॑ भा॒नुर॑ज॒स्र इच्छु॑क्रो दे॒वेषु॑ रोचते। सꣳसृ॒ष्टां वसु॑भी रु॒द्रैर्धी॑रैः कर्म॒ण्या मृ॑दम॒।  
हस्ता॑भ्यां मृ॒द्वीं कृ॒त्वा सि॑नीवा॒ली करो॑तु (१९)

ताम्। सि॒नीवा॒ली सु॑क॒पर्दा सु॑कुरी॒रा स्वौ॑प॒शा। सा तु॒भ्यम॑दि॒ते मह॑ ओ॒खां  
द॒धातु॑ ह॒स्तयोः॑। उ॒खां करो॑तु श॒क्त्या बा॑हु॒भ्याम॑दि॒तिर्धिया॑। मा॒ता पु॒त्रं यथो॑प॒स्थे सा॒ग्निं  
बि॒भर्तु॑ गर्भ॒ आ। म॒खस्य॑ शिरो॑ऽसि य॒ज्ञस्य॑ प॒दे स्थः॑। वस॑वस्त्वा कृ॒ण्वन्तु॑ गा॒यत्रे॒ण  
छन्द॑साऽङ्गि॒रस्व॑त्पृथि॒व्यासि॑ रु॒द्रास्त्वा कृ॒ण्वन्तु॑ त्रैष्टु॒भेन॒ छन्द॑साऽङ्गि॒रस्व॑दन्तरि॒क्षम॑स्या-  
(२०)

दि॒त्यास्त्वा कृ॒ण्वन्तु॑ जा॒गते॑न॒ छन्द॑साऽङ्गि॒रस्व॑द्वो॒रसि॑ वि॒श्वे त्वा दे॒वा वै॒श्वान॑राः  
कृ॒ण्वन्त्वानु॑ष्ट॒भेन॒ छन्द॑साऽङ्गि॒रस्व॑दि॒शोऽसि॑ ध्रु॒वाऽसि॑ धा॒रया॒ मयि॑ प्र॒जाꣳ रा॒यस्पोष॑  
गो॒पत्यꣳ सु॒वीर्यꣳ स॒जा॒तान् यज॑माना॒यादि॑त्यै रा॒स्त्रास्य॑दि॒तिस्ते बि॒लं गृ॒ह्णातु॑  
पा॒ङ्केन॒ छन्द॑साऽङ्गि॒रस्व॑त्। कृ॒त्वाय॑ सा म॒हीमु॒खां मृ॒न्मयीं॑ योनि॒म॒ग्नये॑। तां पु॒त्रेभ्यः॑  
सम्प्रा॑यच्छु॒ददि॑तिः श्र॒पया॑नि॒ति॥ (२१)

मित्रः करोत्वन्तरिक्षमसि प्र चत्वारि च॥ [५]

वसंवस्त्वा धूपयन्तु गायत्रेण छन्दसाऽङ्गिरस्वद्रुद्रास्त्वा धूपयन्तु त्रैष्टुभेन  
छन्दसाऽङ्गिरस्वदादित्यास्त्वा धूपयन्तु जागतेन छन्दसाऽङ्गिरस्वद्विश्वे त्वा देवा  
वैश्वानरा धूपयन्त्वानुष्टुभेन छन्दसाऽङ्गिरस्वदिन्द्रस्त्वा धूपयत्वङ्गिरस्वद्विष्णुस्त्वा  
धूपयत्वङ्गिरस्वद्वरुणस्त्वा धूपयत्वङ्गिरस्वददितस्त्वा देवी विश्वदेव्यावती पृथिव्याः  
सधस्थेऽङ्गिरस्वत्खनत्ववट देवानां त्वा पत्नीर- (२२)

देवीर्विश्वदेव्यावतीः पृथिव्याः सधस्थेऽङ्गिरस्वदधतूखे धिषणास्त्वा देवीर्विश्वदेव्यावतीः  
पृथिव्याः सधस्थेऽङ्गिरस्वदभीन्धतामुखे ग्रास्त्वा देवीर्विश्वदेव्यावतीः पृथिव्याः  
सधस्थेऽङ्गिरस्वच्छपयन्तूखे वरूत्रयो जनयस्त्वा देवीर्विश्वदेव्यावतीः पृथिव्याः  
सधस्थेऽङ्गिरस्वत्पचन्तूखे मित्रेतामुखां पंचैषा मा भेदि। एतां ते परि ददाम्यभित्यै।  
अभीमां (२३)

महिना दिवं मित्रो बभूव सप्रथाः। उत श्रवसा पृथिवीम्। मित्रस्य चर्षणीधृतः  
श्रवो देवस्य सानसिम्। द्युमं चित्रश्रवस्तमम्। देवस्त्वा सवितोद्वपतु सुपाणिः स्वङ्गुरिः।  
सुबाहुरुत शक्त्या। अपद्यमाना पृथिव्याशा दिश आ पृण। उत्तिष्ठ बृहती भवोर्ध्वा तिष्ठ  
ध्रुवा त्वम्। वसंवस्त्वाऽऽ छन्दन्तु गायत्रेण छन्दसाऽङ्गिरस्वद्रुद्रास्त्वाऽऽ छन्दन्तु  
त्रैष्टुभेन छन्दसाऽङ्गिरस्वदादित्यास्त्वाऽऽ छन्दन्तु जागतेन छन्दसाऽङ्गिरस्वद्विश्वे त्वा  
देवा वैश्वानरा आच्छन्दन्त्वानुष्टुभेन छन्दसाऽङ्गिरस्वत्॥ (२४)

पत्नीरिमा रुद्रास्त्वाऽऽ छन्दन्त्वेकाग्रविश्रुतिश्च॥ [६]

समास्त्वाग्ने ऋतवो वर्धयन्तु संवत्सरा ऋषयो यानि सत्या। सं दिव्येन दीदिहि  
रोचनेन विश्वा आ भाहि प्रदिशः पृथिव्याः। सं चेध्यस्वाग्ने प्र च बोधयेन्मुच्च तिष्ठ  
महते सौभगाय। मा च रिषदुपसत्ता ते अग्ने ब्रह्माणस्ते यशसः सन्तु मान्ये। त्वामग्ने  
वृणते ब्राह्मणा इमे शिवो अग्ने (२५)

सुवरणे भवा नः। सपत्न्या नो अभिमातिजिच्च स्वे गये जागृह्यप्रयुच्छत्र।  
इहैवाग्ने अधि धारया रयि मा त्वा नि क्रन्पूर्वचितो निकारिणः। क्षत्रमग्ने सुयममस्तु  
तुभ्यमुपसत्ता वर्धतां ते अनिष्टतः। क्षत्रेणाग्ने स्वायुः स रभस्व मित्रेणाग्ने मित्रधये  
यतस्व। सजातानां मध्यमस्था एधि राज्ञामग्ने विहव्यो दीदिहीह। अति (२६)

निहो अति स्निधोऽत्यर्चित्तिमत्यरातिमग्रे। विश्वा ह्यग्रे दुरिता सहस्वाथास्मभ्यः  
सहवीराः रयिं दाः। अनाधृष्यो जातवेदा अनिष्टृतो विराडग्रे क्षत्रभृद्दीदिहीह। विश्वा  
आशाः प्रमुञ्चन्मानुषीर्भियः शिवाभिर्द्य परि पाहि नो वृधे। बृहस्पते सवितर्बोधयैनः  
संशितं चिथ्सन्तराः सः शिशाधि। वर्धयैनं महते सौभगाय (२७)

विश्व एनमनु मदन्तु देवाः। अमुत्रभूयादध यद्यमस्य बृहस्पते अभिशस्तेरमुञ्चः।  
प्रत्यौहतामश्विना मृत्युमस्माद्देवानामग्रे भिषजा शचीभिः। उद्वयं तमसस्परि पश्यन्तो  
ज्योतिरुत्तरम्। देवं देवत्रा सूर्यमगन्म ज्योतिरुत्तमम्॥ (२८)

इमे शिवो अग्रेऽति सौभगाय चतुर्विंशच्च॥ [७]

ऊर्ध्वा अस्य समिधो भवन्त्यूर्ध्वा शुक्रा शोचीऽप्यग्रेः। द्युमत्तमा सुप्रतीकस्य  
सूनोः। तनूनपादसुरो विश्ववेदा देवो देवेषु देवः। पथ आनक्ति मध्वा घृतेन। मध्वा  
यज्ञं नक्षसे प्रीणानो नराशः सौ अग्रे। सुकृदेवः सविता विश्ववारः। अच्छायमैति शवसा  
घृतेनैडानो वह्निर्ममसा। अग्निः सुचो अध्वरेषु प्रयथ्सु। स यक्षदस्य महिमानमग्रेः  
स - (२९)

ई मन्द्रासु प्रयसः। वसुश्चेतिष्ठो वसुधातमश्च। द्वारो देवीरन्वस्य विश्वे व्रता ददन्ते  
अग्रेः। उरुव्यचंसो धाम्ना पत्यमानाः। ते अस्य योषणे दिव्ये न योनावुषासानक्तौ।  
इमं यज्ञमवतामध्वरं नः। दैव्या होतारावूर्ध्वमध्वरं नोऽग्रेर्जिह्वामभि गृणीतम्। कृणुतं  
नः स्विष्टिम्। तिस्रो देवीर्बर्हिरेदः सदन्त्विडा सरस्वती (३०)

भारती। मही गृणाना। तन्नस्तुरीपमद्भुतं पुरुक्षु त्वष्टा सुवीरम्। रायस्पोषं वि प्यतु  
नाभिर्मस्मे। वनस्पतेऽवं सृजा रराणस्मना देवेषु। अग्निरहव्यः शमिता सूदयाति।  
अग्रे स्वाहा कृणुहि जातवेद इन्द्राय हव्यम्। विश्वे देवा हविरिदं जुषन्ताम्। हिरण्यगर्भः  
समवर्तताग्रे भूतस्य जातः पतिरेक आसीत्। स दाधार पृथिवीं द्या- (३१)

मुतेमां कस्मै देवाय हविषां विधेम। यः प्राणतो निमिषतो महित्वैक इद्राजा  
जगंतो बभूव। य ईशे अस्य द्विपदश्चतुष्पदः कस्मै देवाय हविषां विधेम। य आत्मदा  
बलदा यस्य विश्वं उपासते प्रशिषं यस्य देवाः। यस्य छायामृतं यस्य मृत्युः कस्मै  
देवाय हविषां विधेम। यस्येमे हिमवन्तो महित्वा यस्य समुद्रः रसां सहा- (३२)

ऽऽहुः। यस्येमाः प्रदिशो यस्य बाहू कस्मै देवाय हविषां विधेम। यं क्रन्दसी

अवसा तस्तभाने अभ्यैक्षेतां मनसा रेजमाने। यत्राधि सूर उदितौ व्येति कस्मै देवाय  
हविषा विधेम। येन द्यौरुग्रा पृथिवी च दृढे येन सुवः स्तभितं येन नाकः। यो अन्तरिक्षे  
रजसो विमानः कस्मै देवाय हविषा विधेम। आपो ह यन्महतीर्विश्व- (३३)

मायन्दक्षं दधाना जनयन्तीरग्निम्। ततो देवानां निरवर्ततासुरेकः कस्मै देवाय  
हविषा विधेम। यश्चिदापो महिना पर्यपश्यदक्षं दधाना जनयन्तीरग्निम्। यो देवेष्वधि  
देव एक आसीत्कस्मै देवाय हविषा विधेम॥ (३४)

अग्नेः स सरस्वती द्या९ सह विश्वञ्चतुर्भिः शश्वः॥ [८]

आकूतिमग्निं प्रयुज९ स्वाहा मनो मेधामग्निं प्रयुज९ स्वाहा चित्तं विज्ञातमग्निं  
प्रयुज९ स्वाहा वाचो विधृतिमग्निं प्रयुज९ स्वाहा प्रजापतये मनवे स्वाहाऽग्नये  
वैश्वानराय स्वाहा विश्वे देवस्य नेतुर्मतो वृणीत सख्यं विश्वे राय इषुध्यसि द्युम्नं  
वृणीत पुष्यसे स्वाहा मा सु भित्था मा सु रिषो द९हंस्व वीडयस्व सु। अम्बं धृष्णु  
वीरयस्वा- (३५)

ऽग्निश्चेदं करिष्यथः। द९हंस्व देवि पृथिवि स्वस्तय आसुरी माया स्वधया  
कृताऽसि। जुष्टं देवानामिदमस्तु हव्यमरिष्टा त्वमुदिहि यज्ञे अस्मिन्। मित्रैतामुखां  
तपैषा मा भेदि। एतान्ते परि ददाम्यभित्यै। द्वित्रः सर्पिरासुतिः प्रलो होता वरेण्यः।  
सहसस्पुत्रो अद्भुतः। परस्या अर्घिं संवतोऽवरा९ अभ्या (३६)

तरा। यत्राहमस्मि ता९ अवा परमस्याः परावतो रोहिदंश्च इहाऽऽ गंहि। पुरीष्यः  
पुरुप्रियोऽग्ने त्वं तरा मृधः। सीद त्वं मातुरस्या उपस्थे विश्वान्यग्रे वयुनानि विद्वान्।  
मैनामर्चिषा मा तर्पसाऽभि शूशुचोऽन्तरस्या९ शुक्रज्योतिर्वि भाहि। अन्तरंग्रे रुचा  
त्वमुखायै सदेने स्वे। तस्यास्त्व९ हरसा तपञ्जातवेदः शिवो भवा। शिवो भूत्वा  
मह्यमग्नेऽथो सीद शिवस्त्वम्। शिवाः कृत्वा दिशः सर्वाः स्वां योनिमिहासदः॥ (३७)

वीरयस्वा तर्पन्वि९ शतिश्वः॥ [९]

यदग्ने यानि कानि चाऽऽ ते दारूणि दध्मसि। तदस्तु तुभ्यमिद् घृतं तज्जुषस्व  
यविष्ठ्या। यदत्युपजिह्विका यद्वन्नो अतिसर्पति। सर्वं तदस्तु ते घृतं तज्जुषस्व यविष्ठ्या।  
रात्रि९ रात्रिमप्रयावं भरन्तोऽश्वायेव तिष्ठते घासमस्मै। रायस्पोषेण समिषा मदन्तोऽग्ने

मा ते प्रतिवेशा रिषाम। नाभां (३८)

पृथिव्याः समिधानमग्निं रायस्पोषाय बृहते हवामहे। इरं मदं बृहदुक्थं यजत्रं  
जेतारमग्निं पृतनासु सासहिम्। याः सेना अभीत्वरीराव्याधिनीरुगेणा उत। ये स्तेना  
ये च तस्करास्तास्तं अग्नेऽपि दधाम्यास्ये। दष्ट्राभ्यां मलिमूञ्जम्यैस्तस्करा  
उत। हनूभ्यास्तैनाभंगवस्तास्त्वं खाद सुखादितान्। ये जनेषु मलिमूवः  
स्तेनास्तस्करा वने। ये (३९)

कक्षेष्वघायवस्तास्तं दधामि जम्भयोः। यो अस्मभ्यमरातीयाद्यश्च नो द्वेषते  
जनः। निन्दाद्यो अस्मान् दिप्साच्च सर्वं तं मस्मसा कुरु। सशितं मे ब्रह्म सशितं  
वीर्यं बलम्। सशितं क्षत्रं जिष्णु यस्याहमस्मि पुरोहितः। उदैषां बाहू अतिरमुद्वर्चं  
उदू बलम्। क्षिणोमि ब्रह्मणामित्रानुन्नयामि (४०)

स्वा अहम्। दृशानो रुक्म उर्व्या व्यद्यौर्दुर्मरुषमायुः श्रिये रुचानः। अग्निरमृतो  
अभवद्वयोभिर्यदेनं द्यौरजनयत्सुरेताः। विश्वा रूपाणि प्रति मुञ्चते कविः प्रासावीद्वद्रं  
द्विपदे चतुष्पदे। वि नाकमख्यत्सविता वरेण्योऽनु प्रयाणमुषसो वि राजति। नक्तोपासा  
समनसा विरूपे धापयते शिशुमेकं समीची। द्यावा क्षामा रुक्मो (४१)

अन्तर्वि भाति देवा अग्निं धारयन्द्रविणोदाः। सुपर्णोऽसि गरुत्मान्निवृत्ते शिरो  
गायत्रं चक्षुः स्तोमं आत्मा सामं ते तनूर्वामदेव्यं बृहदथन्तरे पक्षौ यज्ञायज्ञियं पुच्छं  
छन्दास्यङ्गानि धिष्णिायाः शफा यजूंषि नाम। सुपर्णोऽसि गरुत्मान्दिवं गच्छ सुवः  
पत॥ (४२)

नाभा वने येन यामि क्षामा रुक्मोऽष्टात्रिंशच्च॥ [१०]

अग्ने यं यज्ञमध्वरं विश्वतः परिभूरसि। स इद्वेषु गच्छति। सोम यास्तं मयोभुवं  
ऊतयः सन्ति दाशुषे। ताभिर्नोऽविता भव। अग्निर्मूर्धा भुवं। त्वं नः सोम या ते  
धामानि। तत्सवितुर्वरेण्यं भर्गो देवस्य धीमहि। धियो यो नः प्रचोदयात्। अचित्ती  
यच्चकृमा दैव्ये जने दीनैर्दक्षैः प्रभूती पूरुषत्वता। (४३)

देवेषु च सवितुर्मानुषेषु च त्वं नो अत्र सुवतादनांगसः। चोदयित्री सूनृतांनां  
चेतन्ती सुमतीनाम्। यज्ञं दधे सरस्वती। पार्वीरवी कन्या चित्रायुः सरस्वती वीरपत्नी



धियं धात्। ग्राभिरच्छिद्रं शरणं सजोषां दुराधर्षं गृणते शर्म यस्सत्। पूषा  
गा अन्वेतु नः पूषा रक्षत्वर्ततः। पूषा वाजं सनोतु नः। शुक्रं ते अन्यद्यजतं ते  
अन्यद् (४४)

विषुरूपे अहनी द्यौरिवासि। विश्वा हि माया अवासि स्वधावो भद्रा ते  
पूषन्निह रातिरस्तु। तेऽवर्धन्त स्वतवसो महित्वना नाकं तस्थुरु चक्रिरे सदः।  
विष्णुर्यद्वावद्वृषणं मदच्युतं वयो न सीदन्नधि बरहिषि प्रिये। प्र चित्रमर्कं गृणते  
तुराय मारुताय स्वतवसे भरध्वम्। ये सहासि सहसा सहन्ते (४५)

रेजते अग्ने पृथिवी मुखेभ्यः। विश्वे देवा विश्वे देवाः। द्यावा नः पृथिवी इमं  
सिध्रमद्य दिविस्पृशम्। यज्ञं देवेषु यच्छताम्। प्र पूर्वजे पितरा नव्यसीभिर्गीर्भिः  
कृणुध्वं सदने ऋतस्य। आ नो द्यावापृथिवी दैव्येन जनेन यातं महि वा वरूथम्।  
अग्निं स्तोमेन बोधय समिधानो अमर्त्यम्। हव्या देवेषु नो दधत्। स हव्यवाडमर्त्यं  
उशिगदूतश्चनोहितः। अग्निर्धिया समृण्वति। शं नो भवन्तु वाजैवाजे॥ (४६)

पुरुषत्वतां यजतन्ते अन्यध्सहन्ते चनोहितोऽष्टौ च॥ [११]

युञ्जान इमामंगृभ्णं देवस्य सन्ते वि पाजसा वसंवस्त्वा समास्त्वोर्ध्वा अस्याकृतिं यदग्ने यान्यग्ने यं यज्ञमेकादश॥११॥

युञ्जानो वर्म च स्थ आदित्यास्त्वा भारती स्वा अहं पद्वत्वारिंशत्॥४६॥

युञ्जानो वाजैवाजे॥

हरिः ॐ॥

॥कृष्ण-यजुर्वेदीय-तैत्तिरीय-संहितायां चतुर्थकाण्डे प्रथमः प्रश्नः समाप्तः॥४-१॥